


KUBAMBUKA MOYO NA MFUMU

 Matondo na nge, Mpangi Neville. Kyese na kuvwanda awa, Mpangi Neville, mpe bweso ya kuvwanda na bisika ya Mazulu dyaka, na kati ya Klisto Yesu. Mpe lutangu ya bantu ke kwamisaka munu ata fyoti ve, yawu ke pesaka munu ngolo ntangu nyonso. Beno zaba, mingi. . . Mu ke kuwaka mingi mbote na ntangu mu kele na lutangu ya fyoti ya bantu, samu ya kele yina mu ke banza ti Dibuundu kele. Yinga, mu kele na Disonuku samu na yawu, ya ke tuba, “Beno vwanda na boma ve, mwa nkonga ya Mameme, Tata ya beno—ya beno me tala mbote na kupesa beno Kimfumu.” Mpe mu ke. . . ya kele na mwa nkonga yina ya Mameme mu zola ti ba tanga munu na kilumbu yina, na bayina Yandi tubaka, “Beno vwanda na boma ve.” Mpe beto ke na kyese mingi na bweso ya kukwiza awa na nkokila yayi.

2 Mpe mu vwanda me kwiza ve na dibanza ya kulonga. Kaka na mwa ntangu fyoti me luta ya vwandaka na muntu vwandaka me kwiza na kyelo, mpe yina na ntangu mu vwandaka tanga, vwandaka kutika mwa dilongi samu na dilongi yina mu zola kusadila awa ntama mingi ve na balukutakanu yina ke na kwiza na Phoenix mpe na Tucson, mpe na kizunga kuna. Mpe kieleka mu vwanda kudya mbote na Kimpeve, beno zaba, na bima ya mbote ya Nzambi, na zulu ya Dikunzi, mpe dilongi na zulu ya *Dikunzi*. Mpe kento ya munu kwizaka mpe yandi tubaka na munu ti ya vwandaka na muntu kwizaka mona munu, mpe mu—mu bakulaka kaka yawu mbote ve, mpe na manima, kuna, yandi tubaka, “Nge ke vwanda na dibuundu na nkokila yayi?”

3 Mpe mu tubaka, “Mu banza.” Mpe mu landilaka na kumeka na kubumba na mpeve yina mu vwandaka sala. Mpe yandi vutukaka mpe tubaka ti ya vwandaka mbevo yina vwanda me kwiza samu ba sambila yandi. Mu tubaka, “Mbote, na yina, mu ke kwenda na dibuundu, na mutindu nyonso, beno me mona, mpe ya ke vwanda kusambila samu na bambevo.” Mu ntangu nyonso, ya kele. . . Beno zaba, bima yina kele. . . beto fwana kuma na bantu na nswalu nyonso beto lenda ntangu bawu ke bela mpe kele na nsatu. Yina nyonso me vwandaka ntete ya kubela zaba wapi mutindu ya zola kutuba kuvwanda ya kubeluka na ngolo ya Nzambi. Wapi bweso mpe kima mosi ya mbote, ya kele.

4 Ntangu yayi, na Lumingu ke kwiza, kana Mfumu zola, ti Mpangi Neville mpe mosi ya bawu kuvwanda ve na kima ya mfunu, Mu vwandaka banza ti Lumingu ke kwiza na suka mu—mu ke nata na bantu nsangu ya munu ya Nowele, samu na kupesa bawu muswa—na kupesa bawu muswa. . . Na bayankaka ya bawu yina ke katukaka ntama, beno zaba, mutindu na Georgie mpe bisika yankaka, mpe yina ke sala bawu kuvutuka

na ntangu ya mbote samu na kusumba bima ya bawu ya Nowele mpe nyonso yina.

⁵ Mpe Billy vwanda me kwiza kaka mpe me tuba na munu, ti yandi, mpangi ya munu ya kento Delores, vwanda me tuba, ti Lumingu ke kwiza na nkokila ntete lukutakanu kubanda, yandi kele na mwa—na mwa makabu samu na bana, mwa manaka awa yina bawu ke sala, beno zaba, mwa nsaka ya Nowele yina bawu zola kulakisa ntete lukutakanu kubanda. Mpe mu tubaka, “Mbote, yina ke vwanda Lumingu na nkokila mutindu yina ve?”

Yandi tubaka, “Yinga.”

Mu tubaka, “Yina ke kwamisa ata fyoti ve, kuna.”

⁶ Ntangu yayi, beno me mona, Kilumbu ya zole yina ke landa ke vwanda kilumbu na ntwala ya Nowele, kuna kana. . . to Kilumbu ya zole yina ke landa, lumingu yankaka, ya kele Nowele. Na yawu yina ke kotisa bantu na batensyo, beno me mona, mpe na yina bantu fwana kuvutuka na bayinzo na kilumbu na ntwala ya Nowele, mpe na Kilumbu ya ntete, na yawu mu vwanda me banza ti mu. . .yinga, na balumingu zole. Ya kele kieleka, balumingu zole kele kieleka. Na yawu na kutala mu banzaka ti mu ke kwiza na nkokila yayi mpe kubika bantu kuzaba yawu, kana Mfumu zola, mpe ti Mpangi Neville kuvwanda na kima ya mfunu ve. Ti, mu ntangu nyonso ke zolaka kupesa nsangu ya munu ya Nowele na dibuundu, mpe nsangu ya munu ya Paki, mpe nyonso yina Mfumu ke tula na ntima ya munu na kupesa. Mpe Lumingu ke kwiza, kana Mfumu kuzola, Lumingu ke kwiza na suka mu ke pesa. . .

⁷ Mpe kikuma mu ke sala yawu na suka na kisika ya nkokila, ya kele samu bantu yina ke katukaka ntama, bawu kuzwa manima ya midi na kuzyeta samu bawu kwenda na yinzo, beno me mona. Mpe mu zolaka zola mingi ti ya kusalama na nkokila, mu banza ti nkokila me lutila mbote mingi. Mu—mu ke zolaka lukutakanu ya nkokila, ntangu mwini ke kotaka, kima mosi, ya mutindu yina. Ya vwandaka Nzambi na nsaba ya Eden, vwandaka kwenda na Adam, na madidi ya nkokila mpe vwanda zonza na Adam. Beno me mona, mpe mu ke zolaka lukutakanu ya nkokila. Kasi, mpe mutindu kele mambu awa, na yina ya ke vwanda mbote ti mu sala yawu na suka, mpe kuna bantu lenda kwenda.

⁸ Mpe mu ke vutula matondo ti ba me kumisa tabernacle nene tii awa na kisika ke landa na manima ya beto awa, ba me bwela bisika. Na manima ya kunwana mpe kuningisa, na nsuka beto me kuzwa yawu na mutindu nyonso. Beno zaba, kiboba ya Mpangi Bosworth vwandaka na nzonzolo mosi ya kusakana, yandi vwanda tubaka, “Ba ke pesaka mingi bukebi na bebe yina ke dilaka ngolo mingi.” Na yawu ya kele kieleka, beno zaba, mpe na yawu mu banza ti ya ke futaka ntangu beto ke dilaka mwa ntangu fyoti, beno banza mutindu yina ve?

⁹ Na yawu, mpe mu zola kusala mulabu na zulu ya Mpangi Anthony mpe bampangi ya yandi awa samu na musiki ya kitoko yina. Mu vwanda kuwa yawu kaka na yina mu vwanda kota. Mpe, beno zaba, bisadilu ya bawu kele bampungi. Mu vwanda zola ti mosi ya bana ya munu, na kutala mosi ya bawu, kubula mpungi, mu—mu . . . mpe bisadilu yina ba ke fulaka mupepe.

¹⁰ Becky banda na piano, kasi yandi me kuma na mwa mvula yango ya buntwenya, beno zaba, na yina, yandi zola kubika yawu na ntangu yayi. Mpe—mpe yandi bandaka . . . Mulongisi tubaka ti bawu zolaka banda na mutindu ya musiki ya kuzabana. Ve, ntangu yayi, mu zola ve kutuba . . . beno zaba yina mu zola kutuba, mitindu ya kubanda, mpe nyonso yina, ya musique classique, na manima kubwela musiki ya Nzambi na yawu. Na ntangu yandi vwanda me kuma na kitezo ya yandi ya zulu na yawu, kuna yandi me banza, “Mbote, mu ke bika kaka.” Mpe mu—mu . . . bana kele mambu. Mpe, na mutindu nyonso, ya fwana vwanda mbokolo ya Nzambi, na kubanda. Mu banza ti mpangi ya yandi ya kento, Sarah, na manima kuna ke lutila yandi, na mutindu nyonso, mpe yandi ata mbala mosi ve me kuzwaka lesu. Na yawu, na yina mbokolo ya Nzambi me lutila mbote na ntangu ya ke tala makabu mutindu yina.

¹¹ Kasi mu ke zolaka mpungi. Mu ke bambuka moyo ntangu ba byekaka tabernacle yayi kuna na nsongi, bampungi bulaka ndambu ya kilumbu awa, “Ya kufukama na kulunsi kisika Mvulusi ya munu kufwaka, mu dilaka kuna samu na lemvo ya masumu, kuna Menga kutulamaka na ntima ya munu,” ntangu mu vwandaka tula bisono ya munu na ditadi ya nsongi.

¹² Mpe mu ke bambuka moyo na nkokila mosi na dibuundu Trinity Methodist church, ntangu kiboba ya Mulongisi Morrison . . . Mingi ya beno bantu yina zingaka na bilumbu ya munu ya ntaba ke bambuka moyo na Mulongisi Morrison, kiboba mosi ya santu. Asbury zimbisaka mosi ya bantu ya kulutila nene tuka Asbury kele, ntangu bawu zimbisaka Mulongisi Morrison, na mvula ya yandi, kiboba mosi ya santu. Mpe mu vwanda zolaka ntangu nyonso kuwa yandi kulonga. Mpe mu kwendaka kuna samu na kuwa yandi kuna na dibuundu Trinity Methodist church. Mpe na nkokila yina, bana ya babakala zole kubasikaka na mwa baliko mosi kaka na ntangu kento ya munu na munu vwandaka belama, mpe bawu vwandaka ya kusimba bampungi ya bawu na zulu mutindu yayi, mpe bisadilu yina kuna, mpe bawu vwandaka sika, “Ya kufukama na kulunsi kisika Mvulusi ya munu kufwaka!” Na kulunsi yina ya nene na zulu, ke baluka. Mu me telema kaka na bala-bala mpe me telemisa maboko ya munu, mu bandaka kaka na kukumisa Nzambi kaka kuna. Mu vwanda lenda ve.

¹³ Ya kele na mutindu mosi ya kuningana ya nzutu na kati ya Muklisto yina me butuka dyaka, na ntangu Yawu ke salamaka, ya kele na kima fwana kusalama, ya kele nyonso yina ya kele.

Oh, mu . . . Ya kele ve na kima mutindu Muklisto ya ntangu ya ntama. Ya kele kieleka. Mu ke baka kima ve samu na yawu, kimbangi ya munu, mu ke sobisa yawu ve samu na kimvwama ya yinza, to yinza ya muvimba, to sysiteme nyonso ya kutambula ya mwini mpe nyonso, samu na yina Yesu longaka munu samu na Yandi mosi.

¹⁴ Ya kele na muntu mosi yina kele ya kuvwanda na beto awa, ntangu nyonso mu ke talaka yandi ntima ya munu ke bulaka. Ya kele bakala mu monaka yandi kubaka kominyo, nkokila yankaka yina, yandi ke tambulaka na lubota. Ya kele na muntu me tubaka ntete na nge ti nge kele mutindu Oral Roberts? [Mpangi ya bakala me tuba, “Mbote, mpangi, nge tubilaka munu yawu, kaka ntangu yayi na ntangu mu vwanda me kota awa. Mu vwandaka vingila ti nge bakula yawu.”—Mu.] Mu tuba na beno, konso ntangu mu . . . Bantu yikwa . . . Beno me monaka Oral Roberts, na kutala beno nyonso. Kana yandi kele ve mutindu Oral Roberts! Ya vwanda me kwizila kaka dyaka munu na kutala yandi. Mpe mu—mu banza ti yandi kele mwa nene mingi kulutila Oral. Kasi kaka na kutala mutindu yandi ke sanaka nsuki ya yandi, mpe mbunzu ya yandi mpe mitindu ya yandi, mpe ntangu nyonso ke talana mutindu muntu ya lukumu, yina ke vwanda mutindu Oral. Mpe na yawu mu—mu ke kukiyufulaka ntangu nyonso, “Ya kele Mpangi Oral?” Yandi ke talana kaka mutindu mosi na yandi.

¹⁵ Mpangi Oral ke na kubandaka lukolo mosi ya Biblia kuna na ntangu yayi, mu banza, to kima ya mutindu. Mu kuwaka yawu kilumbu yankaka yina. Yinki ya kele? [Mpangi Neville me tuba, “Lukolo ya nene.”—Mu.] Lukolo ya nene. Yinga. Mpangi Carl Williams kele mosi ya makunzi ya yandi na yawu, na kima ya mutindu, mu zaba kaka ve yina ya kele ntangu yayi.

¹⁶ Mbote, ntangu yayi beno bambuka moyo, na Lumingu, kana Mfumu zola, beto ke banda, mu kele na Paki . . . to nsangu ya Nowele. Mpe na yina mu ke—mu ke vutula matondo samu na tabernacle yina me banda. Mpe kuna mu banza ti yayi ke vwanda kaka ve kubwela ya lutangu ya bantu, kasi ya ke vwanda kubwela ya lemvo yina Nzambi ke pesa na dibuundu ya beto, na movema ya beto, ya beto . . . movema ya beto ve, kasi na dibuundu ya beto yina beto me vukana kintwadi. Beto ke zolaka yawu.

¹⁷ Mpe—mpe mu ke zola kaka kutuba yayi. Mu ke baka ntangu mingi ve. Kasi, mu kele na bima mingi yina mu fwana tuba, kasi mu ke tubaka ve, ya ke baka ntangu mingi. Kasi, mu zola kutuba yayi, ya kele kima yina mu lenda tuba ve. Ya kele bima (muntu nyonso zaba) ti beno zaba, mpe ya kele na Nkumbu ya Mfumu, kasi beno lenda tuba ntete yawu ve. Beno me mona, beno fwana bumba yawu samu na beno mosi. Beno me mona? Kasi dyambu mosi ke na kusalamaka, mpe ya me kuma mwa bilumbu, yina ke na kukubamaka na kusalama, ti mu kuzwaka malongi na kutalaka mbote Mpeve-Santu kutambula na kati-

kati ya bantu tii na kisika yina, mpe bawu zaba ve kima mosi, beno me mona, kasi beno ke mona Mpeve-Santu kutambula tii kuna. Mu ke monisa yawu, kana Mfumu zola, na ntangu mosi ya mbote. Ntangu yayi, beno bambuka moyo, yina ke lakisa Nzambi na kati-kati ya bawu.

¹⁸ Mutindu muntu mosi, mu banza, mpangi mosi, yinga, yina vwanda me tuba ntama mingi ve, Mpangi Neville vwanda me tuba ti, “Nzambi, ke tangaka ve kukondwa kusungama ya beto—ya beto, nkadulu ya beto ya yimbi na meso ya Yandi.” Ti mumoni yina kwendaka tala na zulu ya Israel, mpe lendaka na kutala yawu na meso ya nsuni, mpe monaka mutindu kukondwa kusungama bawu vwendaka, mutindu ti bawu salaka yimbi mpe bawu zolaka vwanda ya kusinga. Kasi yina évêque kondwaka na kumona vwendaka Ditadi yina ba bulaka mpe Nyoka yina ya Kisengo, beno me mona, yina vwendaka katula masumu. Na yawu, beno me mona, ntangu—ntangu Balaam talaka na zulu ya Israel, yandi monaka kikuma ya kusinga bawu. Beno me mona? Kasi ntangu Nzambi talaka na zulu ya bawu, Yandi monaka kukatula-masumu. Yandi tubaka, “Nge kele mutindu mpakasa.” Amen. “Nani ke tula kima mosi na nzila ya nge? Mutindu busantu, mutindu batenta ya nge kele ya kusungama!” Ya kele mutindu Nzambi vwendaka mona bawu. Beno me mona? Ya kele ve mutindu muntu ke mona bawu, mutindu bantu ya nene ya lukumu ke mona bawu; kasi mutindu Yandi monaka bawu.

¹⁹ Mpe, O Nzambi, bika ti ya kuvwanda kitini ya munu! Bika ti yina kuvwanda kitini ya munu, samu mu kele na kima mosi ve na kati ya munu yina mu lenda lomba. “Mu ke na kima ve na maboko ya munu yina mu ke nata, kaka na kulunsi ya Nge mu ke kangama.” Beno me mona, yawu yina kaka beto ke na yawu.

²⁰ Mbote, yayi kele lukutakanu ya bisambu na nkokila yayi, to lukutakanu ya bisambu ve na nkokila yayi, kasi yayi kele mutindu ya nkonga ya bantu ke mwangisa nsangu awa. Beto—beto zola kunata Ndinga. Mpe ya lendaka vwanda ti mu ke zola kuzonza na beno na nkokila yayi baminuti fyoti. Mingi ya beno yina zola kuzibula Masonuku . . . Mbote, beno zaba, kima ya ngitukulu, ya me zibuka kaka kieleka na yawu, na bisono yina zola kutanga. Yinga, tata. ngitukulu. Ya vwendaka ya Ntete ya Corinthiens, kapu 11, mpe mwa banoti yina mu sonikaka awa, kisika mosi na kati awa, yina mu vwendaka banza, kana mu lenda kuzwa yawu kaka ntangu yayi, na ya Ntete ya Corinthiens, kapu 11. Yawu yayi kaka awa, kaka awa. Yinga, tata.

²¹ Ntangu yayi, ntete beto belama na Ndinga, beto belama na Musoniki, beno me mona, Yandi yina kele Ndinga, ti beto lendaka lomba kyadi mpe balusakumunu ya Yandi na yina beto ke longuka Yandi Yandi yina kele Ndinga. Beto sambila.

²² O Mfumu Nzambi, ya kifuluka na lemvo mpe kyadi, Nge yina zolaka na nzila ya nsungi, na manima muntu sumukaka

mpe salaka dibulu yina ya nene na kati-kati ya yandi na Nge, yina yandi na yandi mosi vwanda lenda dyaka ve kusabuka. Yandi vwandaka kieleka, ya muvimba ya kuzimbana, kukondwa nzila ya kuvutuka. Kasi Nzambi ya . . . ya kufuluka na lemvo nyonso, vwandaka zola kubaka Kiyingilu na kisika ya yandi, mpe vutulaka yandi. Yina me sepedisa bantima ya bantu nyonso yina me zabaka ntete Nge ve, Mfumu, mutindu ti na zola ya Nge mpe lemvo ya nene Nge bakaka Kiyingilu! Mpe kaka mutindu na nzila beto me tuba yawu, Mfumu, ya kele na zulu ya Kiyingilu yina beto ke tala na nkokila yayi, na Yandi Yina kufwaka na kisika ya beto bansumuki, Yandi Muntu na zulu ya Yandi ba tulaka masumu ya beto. Ya kele na kati ya Yandi ti beto ke tula kivuvu.

²³ Ntangu yayi beto ke belama kaka na Ndinga ya Yandi, na bantima mpe bayintu ya kukulumusa, na buzitu mpe buzitu ya nene mpe na matondo. Mpe ke lomba ti Nge ke fidisa beto na nkokila yayi, lemvo, na nzila ya Mpeve-Santu, mpe ke pesa beto Dimpa ya Luzingu yina beto ke vwanda na nsatu samu beto zinga. Nge zaba kieleka yina beto ke na yawu nsatu, mpe beto zaba ti Nge silaka ti kana beto ke lomba beto ke kuzwa.

²⁴ Beto ke bambuka moyo na nkokila yayi, Mfumu, na bayina nyonso beto zaba yina ke na kubela mpe kele na nsatu, ti lemvo ya Nzambi ke pesama na bawu na mutindu ya kulutula. Mpe, Tata, beto ke sambila samu na bayina me kubwa, ti konze yayi yina ke na kwiza ke nata kubambuka moyo na bantima ya bawu, yina na kisika bawu vwandaka kilumbu mosi, mpe me kubwa na nganda ya kisika ya kubundana ya Nge. Nzambi, beto ke sambila ti bawu ke vutuka (sala yawu, Mfumu), kuvutuka na dibuundu, na—na Kimvuka ya Mbutukulu ya Ntete, kuvutuka na kisika ya kele na lemvo mpe mawa, mpe zola mpe mambote, mpe kubeluka ya myoyo ya beto, ya mabanza ya beto mpe ya banzutu ya beto. Pesa yawu, Mfumu. Sakumuna Ndinga na nkokila yayi. Pesa beto nyonso ngolo, mpe pesa beto balusakumunu ya Nge, na yina beto me lomba yawu na Nkumbu ya Yesu. Amen.

²⁵ Ntangu yayi, kaka samu na mwa ntangu fyoti mu ke zola kubenda bukebi ya beno na ya Ntete ya Corinthiens, kapu 11, na nzila 23, 24, mpe 25.

Samu ti mu kuzwaka na Mfumu yina mu tubaka na beno, Ti Mfumu Yesu na mpimpa mosi yina ba yekulaka yandi bakaka dimpa:

Mpe na manima yandi vutulaka matondo, yandi bukaka yawu, mpe tubaka, Beno baka, mpe beno kudya: yayi kele nzutu ya munu, yina me bukana samu na beno: beno sala mutindu yayi na kubambukila munu moyo.

Na manima ya mutindu mosi mpe mpe na manima yandi me kudya, yandi bakaka mbungu, tubaka, Mbungu yayi kele ngwisani ya malu-malu na menga

ya munu: beno sala yayi, konso ntangu beno ke kunwa yawu, beno ke bambukila munu moyo.

26 Kana mu lendaka bokila yawu kaka mwa yintu ya dilongi yina mu ke zola kutubila, ya ke vwanda yayi: *Kubambuka Moyo Na Mfumu*. Ya ke wakana mutindu nkokila yina. . . to nsangu yina ba zolaka longi na Lumingu ya nsuka, na zulu ya madya ya nkokila ya Mfumu. Kasi mu zola kuzonzila yawu kaka na mwa nsongi ya mutindu yankaka na baminuti fyoti, na yina beto ke vukisa mabanza ya beto—ya beto kintwadi, mpe na lusambulu ya Mfumu.

27 Beto lenda, ya kieleka, kubanda na mesa ya Mfumu, samu ti ya kele kisika ya mbote yina beto nyonso ke bambuka moyo. Kubambuka moyo na Mfumu na mesa ya Yandi, yina, ya kieleka, bisono ke talisa yawu. Kasi, ya kele, Paul tubaka ti beto fwana baka mbungu ya vinu mpe—mpe kunwa menga, mpe kudya dimpa kascher, na kubambukila moyo, na kubambuka moyo na yina Yandi salaka samu na beto. Mpe na yina—na yina beno ke sala yawu, beno ke zola ve kusala yawu kaka kima ya mutindu nyonso, kima ya konso kilumbu; beno zola kieleka kukwiza, kubambuka moyo na Mfumu. Beno me mona? Beno bambuka moyo ti ya vwandaka lemvo ya Yandi mpe kyadi ya Yandi, mpe yina kaka, yina ke pesa beno kivuvu kaka yina kele na beno. Ata nyonso yina beno lendaka sala, ya kele na kima mosi ve kisika mosi yina lendaka na mutindu nyonso lendaka belama na yina Klisto salaka samu na beno.

28 Mu vwanda me kuzwa kimbangi mosi ya mawa lumingu yayi, mpe dyaka mosi ya kembo, mutindu mu lendaka bokila yawu, Mu me zika mpangi mosi ya bakala yina vwandaka mbala mosi awa na beto. Mpe mingi ya beno zaba dyambu. Ya vwandaka Mpangi ya beto ya ntalu Rogers, Busty Rogers, mutindu beto vwanda bokilaka yandi, Everett. Mpe Mpangi Banks Wood awa, mpe Mpangi Sothmann, beto kwendaka kintwadi na luzikulu.

29 Mpe—mpe mu nataka ditoma na kati ya mvula ya mpembe, kuna na kisika yina mu zikaka yandi ntete, ya me kuma pene ya bamvula makumi zole na tanu me luta. Kilumbu yina ntangu mu zikaka yandi, ya vwandaka na kati ya maza ya potopoto, na Nkumbu ya Mfumu Yesu Klisto. Na yina beto vwandaka sabuka kyamvu ya ntama kuna na Totten Ford, mu vwandaka zonga na bampangi ya munu ya babakala, mpe tubaka, “Kilumbu mosi ntangu mulongi mosi ya denomination vwandaka na tenta ya nene kuna, yandi tubaka, ‘Mwa muntu ya ngitukulu yina kuna na dibuundu ya ba-Baptiste, yina ke na kubotika bantu na Nkumbu ya Yesu Klisto,’ yandi tubaka, ‘kana muntu mosi kubotamaka kaka na mutindu yina, mu ke lenda kaka ve kuyamba yandi na tenta ya munu.’”

30 Mpe na ntangu yina ya vwandaka muntu mosi ya kuvwanda kuna yina kuzwaka mbotika na Nkumbu ya Mfumu Yesu, mpe

ya vwandaka Mpangi George Wright mpe dibuta ya yandi. Bawu vwandaka kaka . . . Kima kaka yina bawu zolaka sala vwandaka kuvutuka dyaka ve.

³¹ Na yawu kilumbu yina na ford, oh, yandi bikaka kaka lukutakanu ya yandi mpe yandi kwizaka kuna na mutindu samu na kutala mbote, mpe dibuundu ya yandi vwandaka ya kutelama kuna. Mpe mu me belama na kisika yango. Mpe ya vwandaka na mvula nokaka na zulu ya mongo kuna, mpe ba vwandaka me tsyemisa bilanga ya poto-poto, ya kele mwa banzadi ya fyoti kumisaka Blue River poto-poto mingi. Mu kotaka na maza, maza vwanda suka munu na luketo. Mpe munu . . . Mosi ya ba-administrateur, to ya ba-diacre, mu zolaka tuba, pesaka munu Biblia, mpe mu tangaka kisika Pierre tubaka na Kilumbu ya Pentecote, “Beno balula ntima, mosi na mosi ya beno, mpe beno botama na Nkumbu ya Yesu Klisto samu na lemvo ya masumu, mpe beno ke kuzwa dikabu ya Mpeve-Santu.”

³² Ya vwandaka kilumbu yina Georgie Cartwright vwandaka ya kulala kuna, vwanda meka na kutelemisa maboko ya yandi, yandi vwanda peze kaka na kutala bakilo makumi sambanu na kima, yandi salaka bamvula makumi yivwa mpe bangonda nana na mfulu, kukondwa kutelama. Mpe bantu ya yandi, dibuundu yina ya vwandaka mambele, tubaka, kana muntu mosi kukwiza na lukutakanu ya munu, ba ke tula yandi na nganda ya kimvuka ya dibuundu ya bawu. Mpe na yawu ya vwandaka na nkokila yina mosi ti yandi kubelukaka na mbala mosi. Mpe kuna yandi zolaka kuzwa mbotika mutindu ntwenya ya kento Nail yina vwandaka na zulu kuna; yina mu monaka na vision, mpe beno zaba disolo yango, maboko ya yandi mpe makulu vwandaka ya kubaluka; mpe mu kwendaka landila vision mpe na ngolo ya Mpeve, mu tentikaka maboko na zulu ya yandi, kuna yandi basikaka na yawu mpe yandi belukaka. Mpe na yawu yandi vwandaka mambele ya dibuundu yango mosi. Mbote, ya vwandaka dibuundu ya ba-Methodiste. Mulongi ya Methodiste, Mpangi Smith, vwandaka yandi yina vwandaka ya kutelama na kumu na dibuundu ya yandi.

³³ Mpe mu bandaka na kubotika na mbotika ya Biblia, Mbotika ya Baklisto. Mpe na kutala na ntangu mu vwandaka me botika bantu tanu to sambanu, na mbala mosi bandonga mpe basinga me zengana, kuna na mongo. Awa me kwiza nkonga ya ba-Méthodiste yina mbala mosi kuna na bilele ya bawu ya mbote, samu na kubotama na Nkumbu ya Mfumu Yesu. Mpe mosi na mosi, bamama ya kulwata swa ya kitoko mpe bilele ya bawu ya ete, lutilaka na poto-poto yina, vwandaka kusuna kizizi na maza ya meso, mpe vwandaka kusuna bantinta ya bikoba, mpe vwandaka kwiza na—na kusala—kusala funguna mpe—mpe samu na kuzwa mbotika.

³⁴ Mpe na kati ya nkonga yina, muntu mosi, ya mapeka ya nene, na kwafe mutindu RA ya basoda, ya kizizi ya nene, muntu na

kutala wandaka nene me belama kuna na kazaka ya yandi ya kitoko, ya bleu. Yandi tubaka, “Munu, mpe, me baka lukanu ya munu.” Ya wandaka Busty Rogers, kukondwa muntu kutuba na yandi kima. Kuna mu zikaka yandi na Nkumbu ya Mfumu Yesu Klisto, na zulu ya funguna ya yandi.

³⁵ Mpe lumingu me luta mu zikaka yandi na Milltown. Mpe mu longaka na zulu ya dilongi: *Kulunga ya Mvumbukulu*. Mu wandaka missionnaire, mpe mu me monaka banzambi ya mutindu na mutindu mpe bantu ya philosophie; mpe nyonso yina ya kele, na nganda ya Buklisto, ya kele kaka philosophie, mutindu ti bawu ke kwikila *yayi, yina, to yankaka*. Kasi Mvangi ya nene Yina salaka kivangu! Ya fwana vwanda Mvangi kana ya kele na kivangu. Mpe kana ya kele na kivangu, ya kele na Mvangi salaka. Mpe kisalu ya muntu nyonso ke lakisa yandi mosi. Kana yandi kele kisadi-mabaya ya mbote, yandi ke salaka kisalu ya mbote, yandi ke tungaka. Mpe kana yandi kele mekanisye ya mbote, yandi ke salaka kisalu ya mbote. Kisalu ya beno ke lakisa kaka beno. Mpe kivangu ya Nzambi ke lakisa Nzambi. Mpe Nzambi salaka nyonso samu na lukanu mosi. Mpe kima nyonso yina ke sadilaka lukanu ya Nzambi, na ntangu ya ke kufwa, ya kele na mvumbukulu. Beno tuba na munu kima mosi. Mpe mu me lakisaka bima mingi, mutindu bafololo mpe bayinti.

³⁶ Mpe mutindu mwini ke telamaka na suka, mwa bebe me butama, ya kulemba, minzenzi ya yawu kele. Na kutala na ngunga ya kumi, ya me kuma ntwenya. Mpe na ngunga ya kumi na zole yawu ke lezima na ngolo ya yawu, na kitoko ya buntwenya ya ndumba to ya ditoko. Mpe na kutala na ngunga ya zole na manima ya midi, yawu ke kuma mutindu munu. Mpe kuna na kutala na ngunga ya tanu na manima ya midi, yawu ke kuma mutindu nkooko ya bakala, yawu ke lala. Mpe na nsuka minzenzi ya yawu ke zimbana na ntoto, mpe yawu ke kufwa. Yawu ke nsuka ya yawu? Yawu me sadila lukanu ya Nzambi. Yawu me vumbula luzingu ya bavegetale na yina yawu wandaka tambula ntoto. Bayinti nyonso yina wandaka ya kufwa mvula me luta, yawu ke vumbula yawu. Yina kele nsuka ya yawu na yina yawu ke sadila lukanu ya Nzambi? Yawu ke vumbuka dyaka suka yina ke landa, na luzingu ya malu-malu! Konso yinti ke salaka mutindu mosi, bima nyonso yankaka, nyonso, ngonda, bambwetete, sysiteme ya mwini, nyonso ke pesa nsilulu.

³⁷ Mpe kana muntu ke sadila lukanu ya Nzambi, ya kele na mvumbukulu kaka kieleka mutindu kima nyonso kele. Kaka kima mosi yawu fwana sala, ya kele, Nzambi ke na kuvingilaka kaka na ntangu, kaka mutindu Yandi ke na kusala ntangu yayi.

³⁸ Makasa ya nene yina me kubwaka kaka na bayinti, yina me kubwa, mu zolaka tuba. Kisika mbwaki, vert, bleu, brun, bantinta ya mutindu nyonso na zulu ya kisika ya ntoto, kisika nkadulu ya Nzambi wandaka ya kufwa na yisi ya yawu, Nzambi

me kuna kaka mbungu ya Yandi ya bafololo. Kasi Yandi zabaka ntangu Yandi ke kuna mbungu ya bafololo, ya ke vwanda na mvumbukulu na printemps! Yinza fwana kwiza kaka na orbite ya yawu tii yawu ke vwanda dyaka na nzila na mwini, mpe yawu ke vumbuka na kusadila bafololo na mafwa.

³⁹ Yawu ke tubaka ata mbala mosi ve, “Yayi kele nsuka,” kulutila ve mingi na makasa, ya mbwaki na yinti, ke tuba ti ya kele nsuka. Kima kaka ya fwana sala, kele ti sikle ya Nzambi kubaluka, tii ntangu ya nkwizulu ya Mwana ya Nzambi. Mpe konso kivangu ya moyo yina kufwaka ntete na Klisto ke monana dyaka. Na Ntwala ya Yandi, na kubambukaka moyo na Yandi. Oh, ntangu mu ke kuma na nsuka ya nzila ya munu, mu zola kufwa na Ntwala ya Yandi, na kubambukaka moyo na Yandi, ti Yandi kele mvumbukulu mpe Luzingu. Yandi kele Yandi yina.

⁴⁰ Na yina ntangu beto ke kwizaka na mesa ya Mfumu. Mesa ya Mfumu, mutindu mu vwanda me bangula yawu awa na ntwala, ya kele ve. . . Beto ke kwikilaka ti yina beto ke bokilaka “kominyo” kele—kele kubaka dimpa. Beto ke tulaka yimbi—yimbi. . . Beto ke tulaka kima ya mbote na kisika ya yimbi. Mambu kele dimpa ve, mambu kele vinu ve, yina kele dimpa kascher mpe vinu. Kasi kima yina kele, kele, *kominyo* zola kutuba “kuzonza na,” mpe, na kuzonzaka na Yandi, kubambuka moyo na Yandi. Mu banza ti ya kele ntangu ya kulutila kusakumunwa na balukutakanu. Beno me mona? Konso ngunga ya luzingu ya beto fwana vwanda kominyo.

⁴¹ Kominyo na Mfumu kele mutindu kisika ya kupema na ntoto ya kuyuma. Ya kele mutindu mukelo na yisi ya dizanga, kisika kizyeti ke luta, ke telama mpe ke kunwa maza tii kuna yandi ke manisa mpwila ya yandi. Yina kele kubambuka moyo na Mfumu. Na kukwizaka landila muswa ya mesa ya Yandi, kisika kizyeti ke luta yina—yina ke na kuzyeta awa na zulu ya ntoto na beto, kintwadi, ti beto lenda belama na mesa ya Yandi, mpe kuna kunwa balusakumunu ya Yandi mpe lemvo ya Yandi mpe ya Ndinga ya Yandi, na kubundanaka na ziunga ya Ndinga ya Yandi, tii myela ya beto ya myoyo ke sepela. Mpe kuna beto ke katuka kisika ya kusambila, ya malu-malu, ya kusepela; kubasika na kukutana dyaka mambu na ntoto ya kuyuma, mambu ya luzingu ya ntoto ya kuyuma. Yinga, kisika ya kupema na ntoto ya kuyuma, na kuzwaka madidi beto mosi, na kusalaka beto mosi na ntangu beto kele na mpwila.

⁴² Ya zolaka vwanda na musambidi nyonso. Yawu ke sepe- . . . Ya kele na musambidi nyonso ya kieleka, ti bawu ke zola kuvwanda kintwadi. Ya kele na kima na zulu ya kominyo yina—yina kele ya Kinzambi, ya kele ya kusala na Nzambi, mpe ya kele santu, ya santu. Mpe muntu ya mbote kele na mpwila ya yawu.

⁴³ Mutindu David tubaka, ti ya yandi “moyo vwandaka na mpwila ya Nzambi, mutindu mbambi samu na maza.” Nkabi yayi

ya fyoti yina ba me lwalisa na nkonga ya bayimbwa na ntulu, mpe yandi me—yandi me kima na yawu. Mpe yandi ke telama, ke vumina mpe ke tala mbote. Kisika, ke nufuna na basense ya yandi yina Nzambi pesaka yandi, yandi lenda nufuna maza na bakilometele. Mpe yandi ke telemisa mwa yintu ya yandi na zulu na yina ya ke na kubasisa menga ya kele luzingu. Mpe yandi zaba, kana yandi lenda kuma kaka na yinto yina, ti yandi lenda zinga. Muntu ve ke lenda kusimba yandi kuna. Kana yandi lenda kukuma na maza, yandi ke lawusa konso yimbwa yina beno lenda tula na manima ya yandi, samu yandi zaba ti yandi—yandi me kuzwa yinto ke pesaka luzingu.

⁴⁴ Mpe ntangu dibuundu ke kumaka na kisika yina, kisika ti Klisto zola kutuba mingi samu na beto ti beto ke na mpwila ya kuvwanda na Mvwandulu ya Yandi mpe mosi na yankaka, ya kele yinto ke pesaka Luzingu. Ata mpeve ya yimbi lenda pamusa beno. Ata lufwa yawu mosi kele ya kununga kuna. Oh, wapi kivuvu! Wapi kisika! Beto ke pema. Mpe, na kusalaka mutindu yina, na kubambukaka moyo na Klisto vwandaka Yandi Yina salaka yawu kusalama samu na beto. Yandi vwandaka Yandi Yina salaka bima yayi samu na beto, beto fwana bambuka Yandi moyo. Na yina, beno bambuka moyo, na ntangu mosi beto vwandaka banzenza mpe vwandaka ya kukondwa Nzambi, Bantu ya makanda, ya kunatama na biteki ya mababa. Kasi, beno bambuka moyo, Klisto kufwaka ve samu na Juif, kasi samu na konso kivangu ya dikanda ya Adam yina kubwaka, Klisto kufwaka.

⁴⁵ Mutindu beto ke kwizaka na kubambuka moyo na Yandi na yinto ya Yandi ya—ya kominyo, ya—ya fwana bambukisa beto moyo mutindu na ntangu Israel vwandaka na nzyetolo ya bawu. Mpe bawu kwizaka, dyaka kaka na kati ya nzila ya kisalu, na nzila ya bawu na Egypte samu na luvukulu ya bawu, na yinsi ya nsilulu, mpe, kaka na kati ya kisalu ya bawu, maza kondwaka. Mpe ya vwandaka ya kuyuma, na kutala, na konso kisika, na konso . . . na yisi ya konso mongo kisika zolaka vwanda na bayinto, ya vwandaka na mosi ve. Mpe bawu vwanda kufwa na ntoto ya kuyuma. Mpe na yina kuna monanaka Ditadi, yina Moise bulaka Ditadi yayi mpe na yawu basikaka maza mingi. Konso bakala kele na mpwila, konso kento kele na mpwila, mwana, to mpe konso kibulu kele na mpwila, lenda kunwa maza mingi.

⁴⁶ Mutindu Jean 3:16, bisono ya wolo ya Biblia, ke tuba, “Mutindu Nzambi zolaka mingi yinza, Yandi pesaka Mwana ya Yandi ya luzolo mosi kaka, ti muntu nyonso yina ke kwikila (ke kwikila, ke bundana, ke bambuka moyo na Yandi) ke kufwa ve, kasi ke kuzwa Luzingu ya Kukonda nsuka.” Na kubambukaka moyo na Klisto vwandaka Ditadi ya beto yina ba bulaka, samu na kuvuukisa yinza yina ke na kufwa, Muntu ya makanda yina ke na kufwa, Juif yina ke na kufwa, yinza yina ke na kufwa. Klisto

pesaka Luzingu ya Yandi na mutindu ya mingi, ti muntu nyonso yina kele na nzala mpe mpwila, tubaka profete, “Tala, kwiza na yinto, sumba na Munu miliki mpe mafuta ya nyosi kukondwa mbongo.” Beno kwiza, samu ti ya kele kominyo, beno kwiza na kubambukaka moyo na Mfumu.

⁴⁷ Mu lenda bambuka dyaka moyo na Mfumu na kisika ya kupema, na dibulu nkumbu *Lachai roi*, yina zola kutuba na ndinga ya Hebreux, “Dibulu ya Yandi yina ke moyo mpe ke mona munu.” Agar, kuwakanaka yimbi, kasi na kati ya nzila ya kisalu. Kubakulamaka yimbi, kufundisamaka yimbi, mpe ba basisaka yandi, na ata kisika ya kukwenda, na mwana yina vwanda kufwa, mpe maza manisaka na mbwata. Mpe mwa mwana yango vwanda dila. Mpe kaka ntima ya mama lendaka zaba yina ya zola kutuba kuwa kudila yina ya maza, na yina mwa ludima ya yandi vwandaka vimba, mpe bikoba ya yandi vwandaka yuma, mpe bebe ya yandi vwandaka lemba konso minuti. Ba basisaka yandi, kaka na kati ya nzila ya kisalu, na ata kisika ya kukwenda. Yandi salaka kukondwa, kukipe yandi mosi, tii yandi me kamuna ditonzi ya nsuka na zulu ya mwa bikoba ya yandi ya kuyuma. Mpe na manima mbwata kuyumaka, mpe yandi tulaka yawu na yisi mpe me banda na kutambula. Mpe mwa mwana yango vwandaka dila samu na maza, mpe yandi vwandaka lemba mingi mpe vwandaka lemba mingi; mpe yandi vwandaka kaka mwana mosi ya yandi.

⁴⁸ Kukondwa ntembe ti ntima ya yandi yina zabaka dyambu ve zolaka boka, “O Nzambi, yinki mu me sala? Yinki mu me sala?” Mpe yandi vwanda lenda ve kumona mwana kufwa na maboko ya yandi, na yawu yandi lalisaka yandi na matiti. Mpe na kutala yandi kwendaka ntama mutindu ndambu ya mukyama, ya lendaka vwanda bametele makumi yivwa na mosi na ndambu to kulutula, mpe yandi monaka mwa yinti, mpe yandi fukamaka mpe kuna yandi bandaka na kudila. Samu yandi kukiyufulaka, “Samu na yinki?” Kana yandi salaka yina vwandaka mbote, samu na yinki dyambu yayi zolaka kwiza na zulu ya yandi? Bambala mingi beto ke banzaka mutindu yina na bimbevo mpe bampasi ya beto, beno me mona, kasi ya lendaka vwanda nyonso ke salama samu na kutalisa lemvo mpe kyadi. Mpe na yina yandi vwandaka banza, yandi kuwaka mwa kuboka ya fyoti ya kulemba mutindu bawu ke bokaka kupema ya nsuka, samu na maza.

⁴⁹ Yandi kuwaka Ndinga mosi kuzonza mpe kutuba, “Samu na yinki nge ke dila? Samu na yinki nge ke na kudilaka?”

⁵⁰ Mpe yandi telemisaka meso na kutala, mpe yandi monaka dibulu ke na kutokisa maza. Wapi yinto ya kupema! *Lachai roi*, mu lendaka tanguna yawu yimbi. B, ba-e zole, r-l-a-h-a-i-r-o-i, yina zola kutuba, “Dibulu ya Yandi yina ke moyo mpe ke mona munu! Yandi yina lenda kufwa ve! Melekisedeki! El Shaddai! Yandi yina ke moyo mpe ke mona munu, yina zaba bansatu

ya munu, Yandi ke bambuka moyo na munu. Mpe kuna Yandi bambukaka moyo na munu mutindu mu bambukaka moyo na Yandi, mpe mu zaba ti Yandi kele moyo mpe Yandi zibulaka awa na ntoto ya kuyuma, dibulu yayi.”

⁵¹ Oh, beto lenda tula yawu na nsangu ya ngunga kaka na ntangu yayi, ya kilumbu yayi ntangu yayi, na ntangu ntoto ya kuyuma ya mabuundu, ya ba-denomination, mpe—mpe balongi ya Nsangu ya mbote ya bantu mpe bamvwatu ya yinza me kota, mpe me sala denomination mpe me mwangana.

⁵² Mpe na yina kubanza ti kuna ya kele dyaka na nkokila yayi, na dibulu ya maza ya Yandi yina ke moyo mpe ke mona munu. Ya kele yina kubambuka moyo na Klisto ke zola kutuba samu na musambidi. Yinga. Oh, ba bakulaka yandi yimbi mpe ba bingisaka yandi. Yesu tubaka, ntangu Yandi vwandaka awa na zulu ya ntoto, “Mu kele Bamaza ya moyo, Mu kele Bamaza ya Luzingu.”

⁵³ Mpe mu zola kulakisa mwa dibanza yankaka awa yina ke na kwiza na dibanza ya munu. Ntangu Yesu vwandaka na zulu ya kumekama, mpe samu na kima yankaka ve kasi samu na kusekisa, na . . . Ba fidisaka yandi katuka Pilate na Hérode. Ntangu yayi, Pilate zolaka sala yawu ve, mpe, beno zaba, na yina yandi mekaka na kusukula maboko ya yandi na yawu. Kasi mbala mosi na maboko ya beno, beno fwana baka lukanu ya beno. Beno lenda pusa yawu ve na zulu ya muntu yankaka. Ya kele beno mosi, mutindu muntu mosi. Kasi Yandi, ba fidisaka Yandi na Hérode, kaka samu—samu na kusekisa, samu ti Yandi vwandaka kaka na nkumbu ya kisadi-kimangu mpe nyonso yina, mpe ba basisa Yandi na dibuundu. Na yawu Pilate yandi mosi, yandi banzaka ti yandi ke fidisa Yandi na Hérode, mpe ti na kutala ya lendaka yidika kukondwa kuwisana ya bawu ya ntama yina vwandaka na bawu, mosi na yankaka.

⁵⁴ Mpe na yawu ba nataka Yesu na babala-bala mpe na kulutilaka na bisika tii Yandi kumaka na yinzo ya lusambusu ya kulutila zulu, ya Hérode. Mpe na ntangu Yandi kukutanaka na Hérode, mpe kuna Hérode kuzwaka bweso ya yandi kaka! Wapi mutindu kilawu muntu lenda vwanda? Kana Hérode zolaka kaka kuzaba ti yina na ntwala ya yandi vwandaka kulungisama ya konso profete ya Hebreux, yina bawu vwandaka sosa, mpwila ya yinza, yina vwandaka ya kutelama na ntwala ya yandi, kulungisama ya konso ndwenga mpe ya konso profete yina me zonzaka ntete. Bweso ya kusepelisa ntima ya yandi ya masumu na lemvo mpe kyadi. Wapi mutindu ya muntu ya kulawuka yandi vwandaka!

⁵⁵ Mpe dyaka mpe ve kulutila mutindu muntu ya kulawuka bubu yayi yina kele na ntwala ya dyambu mosi samu ti beto me kuzwa bamvula mafunda zole ya malongi ya Yandi, ya kyadi ya Yandi. Kasi wapi kima ya bulawu yina Hérode salaka na

ntangu yandi telamaka na ntwala ya Yandi mpe ata mbala mosi lombaka Yandi lemvo mpe kyadi, ata mbala mosi lombaka pardo ya disumu. Yandi zabaka ata mbala mosi ve yina vwandaka ya kutelama... Mu banza ve ti muntu yayi bakulaka yina vwandaka ya kutelama na ntwala ya yandi vwandaka ya kulutula Muntu. Beto bika ti yawu kota mwa ntangu fyoti. Samu ti Muntu yayi vwandaka ve ya kuzabana na kati ya bantu mutindu bantu ya ntelamanu ya nene, ya ba-organisation mpe—mpe ya bimvuka ya mutindu na mutindu, mpe nyonso yina, na bayina Yandi vwanda vwandaka. Yandi vwandaka ve na nkumbu mutindu yina.

⁵⁶ Kasi Yandi vwandaka na yawu, na kati ya bantu yina zabaka Biblia mpe bantu yina zabaka nsilulu. Mpe beno bika ti mu vwanda mwa ngolo, samu na bawu yina vwandaka ya kusoola ntete samu na Luzingu ya Kukondwa nsuka, bawu bakulaka yawu na ntangu Yandi telemaka kuna.

⁵⁷ Kasi Hérode longokaka yayi ve, yandi zabaka yawu ata mbala mosi ve. Wapi kima ya mawa. Yina nyonso baprofete zonzilaka bamvula mafunda yiya, kulungisama ya kudila ya yinza vwandaka ya kutelama na ntwala ya yandi. Kuna na ntwala ya yandi vwandaka ya kutelema kulungisama nyonso. Mpe mutindu mu lenda tuba yayi dyaka, beto lenda banza ti yandi vwandaka muntu ya kulawuka samu yandi bakaka lukanu ya bulawu, samu, beno tala yandi ata mbala mosi ve lombaka yandi kyadi. Yandi lombaka Yandi na—na kusekisa yandi. “Oh, mu me kuwa ti Nge kele kisadi-bimangu.” Yandi lombaka na kusekisa na kisika ya kyadi.

⁵⁸ Ya kele yina yinza, bubu yayi, ke lakisa lukanu ya kieleka ya Hérode, ntangu bawu ke mona Klisto kisalu-bimangu kusala kima mosi bubu yayi yina Yandi salaka kuna, mpe bima yina kaka bawu ke lomba kele, “Bika mu mona nge kusala *yayi-mpe-yayi*.” Beno ke tuba ti Hérode ke vwanda na kisika ya yimbi ya kutelama? Bantu ya kilumbu yayi ke vwanda na kisika ya kulutula yimbi! Hérode kuzwaka mafunda yiya ya kimbangi, ya baprofete mpe ya bantu ya ndwenga. Beto me kuzwa mafunda sambanu, ya malongi kulutula na yina bawu kuzwaka kuna. Kieleka. Wapi kima ya salaka! Mutindu mosi ya kele bubu yayi, kima mutindu mosi!

⁵⁹ Yinki vwandaka dyambu? Hérode ata mbala mosi ve kupesaka yawu dibanza ya mbote. Yandi ata mbala mosi ve kutelamaka na kutala yawu.

⁶⁰ Mpe ya kele mutindu mosi na bantu ya bubu yayi. Bawu ke mona kima ya nene, ya ke yitukisa bawu, kasi bawu ke telama mingi ve. Ba ke na kumeka na kuwa rabbi mosi to muntu mosi ya theologie yina ke bangula Yawu nyonso. Mpe dyaka, mutindu na ntangu mu ke banza na Jeffersonville, bambala yikwa mu me zola kufuka nge mutindu nsusu ke bumbaka bana ya yandi,

kasi nge me zola ve. Bambala yikwa mu me zola kuvukisa nge? Bambala yikwa mu me zola kusala yayi disamba kisika bayinsi nyonso zolaka kwiza na mpepo, kasi nge me zola ve. Beno me mona? Beno me mona?

⁶¹ Ntangu yayi, beno me mona yinki Hérode fwana bambuka moyo na kilumbu yina? Bweso ya Yandi ya nene, yandi mangaka yawu. Mpe kuna kisika mosi na bizunga ya kuzimbana, na nkokila yayi, yandi ke na kubambuka moyo na yina yandi salaka na yina me tala yawu. Ntangu yayi ntangu yimeni.

⁶² Beno bika ve ti ya kuvwanda samu na beto. Yayi kele ntangu ya beto ya kutala. Beto bambuka moyo na Klisto, ti Yandi kele mutindu mosi mazono, bubu yayi, mpe kukonda nsuka, Hébreux 13:8. Beno vingila ve tii ntangu beno ke vwanda na bizunga kuna, na kati ya bantu ya kusemba, na kitezo yina kisika beno lenda kwenda ve na Ntwala ya Nzambi, mpe ntangu ya beno me suka na zulu ya ntoto, na mpimpa ya boma beno ke bambuka moyo ti beno kuzwaka bweso ya beno mpe beno mangaka yawu. Ti bantwenya kubaka noti ya yayi. Ti bantu nyonso kubaka noti na yawu.

⁶³ Hérode ata mbala mosi ve pesaka yawu dibanza ya mbote. Bweso ya yandi kaka, yandi lombaka kaka na kusekisa, mpe ti Yesu lendaka sala mwa kima mosi ya mutindu mazi, kubasisa kalumbu na yimpu, to, beno zaba, to kima mosi mutindu yina. Yandi banzaka ti Yandi lendaka vwanda, na mutindu yankaka, yandi talaka Yandi mutindu nganga-nkisi. “Beto kuwaka ti Nge lenda sala bima. Bika mu mona Nge kusala kima ya Nge ntangu yayi.”

⁶⁴ Mpe bika mu tuba yayi na buzitu nyonso. Kasi bambala yikwa balongi ya kufwanikisa ya bubu yayi, me tubaka, “Kana ya kele na Mpeve-Santu, kana nge ke kwikila ti Mpeve-Santu kele kaka mutindu ya vwandaka na mbandukulu, bika mu mona nge kubaka kiboba *Kingandi* awa, to *yandi yayi*, oh, bakala *yayi* awa, kento *yayi* awa. Mu ke kwenda baka bawu. Bika mu mona nge kusala yawu.”

⁶⁵ Ba ke bakula ti ya kele mpeve mosi (ve, ba lenda ve) nani tubaka na Yesu, “Kana Nge kele Mwana ya Nzambi, baka, kumisa matadi yayi dimpa. Kana Nge kele Mwana ya Nzambi, tuba na beto nani me bula Nge na yintu. Kana Nge kele Profete, tuba na beto nani me bula Nge,” na kitende na zulu ya kizizi ya Yandi. Me bula Yandi na yintu, mpe na manima me pesa nkawa na muntu yankaka, me tuba, “Tuba na beto, kana Nge kele Profete. Tuba na beto nani me bula Nge, kuna beto ke kwikila Nge. Tuba na beto, kana Nge kele Mwana ya Nzambi. Beto kele ya kusungama na kati ya bantima ya beto. Kana Nge kele Mwana ya Nzambi, kulumuka na kulunsi mpe beto ke kwikila ti Nge kele Mwana ya Nzambi.”

66 Mu ke kukiyufula kana bantu mingi bubu yayi, babakala, bakento, bantwenya mpe biboba, kele ve ya kutelama na kisika mosi yina. Mpe beno ke bambuka moyo, kilumbu mosi, ti beno vwandaka na Ntwala ya Yandi, na Yinto ya Yandi; mpe zolaka kumona kima, to zolaka kumona kima ya mutindu kinganga to kima ya mutindu yankaka, “Yina ke sala ti mu kwikila Yawu. Bika mu kuzwa kutekita na mukongo ya munu, mpe ti mu sala *yayi* to *yina*, mu ke kwikila Yawu.” Beno me mona, mwa sensasyo, ya kele ya muvimba kusambila biteki! Bika mu . . .

67 Beno zaba, Yesu tubaka na dyambu mosi, Yandi yufulaka. Mu ke zola kuyufula yayi na dibuundu na nkokila yayi. Yesu tubaka, “Samu na yinki? Samu na yinki? Samu na yinki beno ke bokila Munu ‘Mfumu,’ mpe ke sala ve bima yina Mu ke tuma na beno na kusala? Samu na yinki beno lenda bokila Munu ‘Mfumu,’ mpe ke zitisa ve Ndinga ya Munu? Samu na yinki beno lenda bokila Munu ‘Mfumu,’ mpe ke manga bima yina Mu ke tuma na beno na kulonga mpe na kulungisa?” Yinki ya kele? Yinki ke sala yawu? Ya kele samu ti mwa kinkulu ya denomination me telama na kati-kati ya bawu na Ndinga. Mpe kima nyonso yina ke telama na kati-kati ya beno na Nzambi, ya kele kiteki, yawu ke baka kisika ya Nzambi. Samu na yinki beno ke bokila “Mfumu”? *Mfumu* zola kutuba “muntu ya kuzwa,” Mfumu kele yina kele ya kuzwa kima. Mpe kana Nzambi kele yina kele ya kuzwa munu, kana mu kele ya Yandi, mpe Yandi me balula munu kilumbu mosi ntangu mu vwandaka na nzila ya yimbi, mpe me bokila munu samu na lukanu mosi, yinki mu ke sala kana ti kulungisa luzolo ya Yandi, mutindu Yandi salaka Paul. Wapi mutindu mu lenda sala kima yankaka kana ti kuzitisa Ndinga ya Yandi? “Samu na yinki beno ke bokila Munu ‘Mfumu’?”

68 Mu zola baka muntu yankaka awa, kumona yina me tadila yandi. Wapi mutindu samu na Judas, na wapi mutindu yandi zolaka bambuka moyo na Yandi? Beto ke na kuzonzila na kubambuka moyo na Mfumu. Judas na nkokila yayi mpe, oh, tii yandi ke vwanda dyaka ve, fwana bambuka moyo ti yandi tekisaka bukuluntu ya yandi. Yandi tekisaka Yesu samu na kuzwa mbongo. Beto ke sekaka Judas. Beto ke tubaka ti yandi vwandaka muntu ya mvindu, muntu ya yimbi, ti yandi kele ya kulunga na ata kisika mosi ve to na kati ya bantu ve, ti yandi me lunga ve na Mazulu. Samu na yinki? Yandi tekisaka Mfumu ya yandi, na manima yandi na kuzwa bweso na kuvwanda kaka kilandi, na kuvwanda ntumwa, mbokolo ya kulutila zulu na kati ya Biblia, ya zulu kulutila profete. Yandi kuzwaka bweso ya kuvwanda ntumwa, mpe tekisaka muswa yina samu na kuzwa mbongo. Mpe ntangu yayi yandi fwana bambuka moyo na yawu. Ya kele mutindu yandi ke bambuka moyo na Yesu: samu na kuzwa ndandu ya yandi mosi.

69 Mpe mu ke kukiyufula lutangu ya bawu yikwa na nkokila yayi ke telama dyaka na chaire, ke lwata dyaka mvwela ya

chorale, ke vwanda na kiti ya diakre, to ke baka kisika ya tresorier, ya administrateur, to yina nyonso ya lendaka vwanda, kisika ya yandi na dibuundu, to mulongi na chaire, mpe ke landila na kuteka bweso ya yandi samu na lukumu ya yandi mosi, “Docteur, Bishop *Kingandi*,” samu na lukumu ya yandi mosi, samu na kuzwa ndandu ya yandi mosi.

⁷⁰ Muntu mosi tubaka na munu kilumbu mosi, “Mu ke kwikila ti ya kele Kieleka. Kasi kana mu longa yawu, mu ke vwanda na kulomba kuna na bala-bala.”

⁷¹ Beno ke bambuka moyo na muntu ya mvwama mpe Lazare, yinki vwandaka nsuka ya bawu mpe ntelamanu ya bawu ya Seko? Ata ti mosi kuzwaka . . . vwandaka mulombi, mpe yankaka vwandaka muntu ya bimvwama, kasi kifwanukusu sobaka kilumbu mosi mpe bawu zole zolaka bambuka moyo. Na yawu, bantu na nkokila yayi ke boka samu na Judas yina tekaka Yandi samu na kuzwa ndandu ya yandi mosi, mpe kima mutindu mosi bantu mingi ke sala bubu yayi, ke tekisa Yandi samu na mbongo.

⁷² Banganga-Nzambi ya bilumbu ya bawu ke bambuka mpe moyo ti bawu tekisaka siansi ya bawu na Yandi, siansi ya bawu na kukuma kisadi ya Yandi, na kukuma kilandi ya Yandi, na kukuma mundimi ya Yandi. Ba tekisaka yawu samu na musoki ya pwazo. Ba vwandaka na musoki na Malongi ya Yandi. Mbote, na yina Yandi vwandaka kaka na bamvula kumi na zole, Yandi zolaka kotisa bawu na ntembe; mpe kuzaba yawu ve, ti ya vwandaka Mesiya. Ba zolaka sala ve bima yina Yandi salaka. Mpe bawu vwandaka na boma ti bawu ke zimbisa lukumu ya bawu na ntwala ya bantu ya kulutila zulu, mpe bawu tekisaka bweso ya bawu. Mpe bawu kele kaka ya kuzaba dyambu mutindu Hérode vwandaka.

⁷³ Mpe mambele ya dibuundu ya bubu yayi kele mutindu mosi. Kana bawu tulaka kivuvu na ba—denomination ya bawu mpe nyonso yina, na bilumbu yina, mpe vwandaka na boma ya lukumu ya bawu—ya bawu, ba zolaka basisa bawu na basynagogue, na yina yinki ya vwandaka? Ya vwandaka kusambila biteki! Kusambila kledo ya biteki to lukwikilu ya dibuundu ya biteki, na kisika ya kundima Ndinga ya moyo yina vwandaka talana na ntwala ya bawu.

⁷⁴ Mpe bawu monaka Ndinga ya Nzambi. Biblia me tuba, “Beto me mona Yandi mpe me simba Yandi.” Bantu ya moyo tulaka maboko na zulu ya Ndinga ya kieleka, ya moyo, ya kutalana ya Ndinga ya Nzambi ya moyo; mpe bikaka binkulu mpe bakledo kutelama na kati-kati ya bawu, kusukula banzungu mpe malonga, kima mosi ya mvindu ya kutelama na kati-kati ya bawu na Nzambi ya moyo. Yinga.

⁷⁵ Yinki ya vwandaka? Ba vwandaka na dibanza mosi. Ba vwandaka na dibanza mosi na zulu ya Nsangu ya Yandi ya mbote ya Masonuku ya pwelele, ya kieleka ya yina Yandi vwandaka

longa, Ndinga ya Tata. Ba vwandaka na musoki na Yandi. Ba vwandaka na dibanza mosi na yandi. Mpe ntangu nyonso yina bawu ke bambuka moyo, na yina, dyaka na difelo bawu ke bambuka moyo, ya kele mutindu bawu ke bambuka moyo. Ya kele mutindu bawu fwana bambuka Yandi moyo.

Beno ke tuba, “Oh, yina vwandaka ba-Pharisien.”

⁷⁶ Ya kele na mwa mama mosi yina vwanda kwizaka na dibuundu yayi. Oh, mu banza ti mingi ya beno zaba yandi, yandi ke zingaka na yisi ya bala-bala na kizunga awa. Yandi kubwaka. Mpe ntangu nyonso mu ke mona yandi, yandi ke kwiza mbangu na munu, ke tula maboko ya yandi na kati ya munu, “Mpangi Bill, sambila samu na munu. Mu me kuma retrograde.” Bakala ya yandi kele. . . Ve, mu banza ti bawu ke zingaka kaka na zulu ya bala-bala awa. Mu monaka yandi na Mpeve, mu me mona Mpeve ya Nzambi na zulu ya yandi, mpe yandi vwanda bina, vwanda sepela, mpe nyonso yina. Mpe yandi kubwaka. Mpe yandi vwandaka ya kulala ntama mingi ve na lupitalu awa, vwanda kufwa, bawu banzaka. Mpe yandi tindaka ba bokila munu samu na kwiza sambila samu na yandi.

⁷⁷ Yandi na bakala ya yandi vwandaka bantu ya mbote mingi samu na kento ya munu, ntangu kento ya munu, vwandaka ntwenya, mwana ya kento ya kizizi ya mvindu, na bitende, mpe bawu vwandaka sumbila yandi mwa robe to kima mosi bantangu yankaka, samu na kusadisa yandi na kukwenda na lukolo. Ata mutindu ya kele fyoti, beno lenda ve kusala kima mosi samu na Nzambi ti Yandi kubambuka moyo na yawu. “Na yina nyonso beno me sala na bana ya Munu ya fyoti yayi, beno me sala yawu na Munu.” Mpe mutindu dimpa na zulu ya maza, ya ke vutuka.

⁷⁸ Kuna vwandaka ya kulala mwa kento yayi, ya mputu, yina me vutuka manima, yandi vwanda dila, simbaka diboko ya munu. Mpe yandi. . . Mu tubaka, “Mbote, mpangi ya kento, mu ke—mu ke sambila samu na nge.”

⁷⁹ Mpe na mbeto yankaka na lweka ya yandi vwandaka kento mosi ya kulala kuna na maboko ya yandi ya kufutika, vwandaka tala munu. Mpe ntwenya ya mwana ya yandi ya bakala vwandaka ya kuvwanda na lweka ya yandi, na kutala ya bamvula makumi zole, ricky mosi na kutala ya bilumbu yayi.

⁸⁰ Na yawu, ya kele ve samu na kukondwa buzitu kana nkumbu ya muntu mosi lendaka vwanda Ricky, kasi mu zola kutuba ti ya kele. . . beno kuwaka ata mbala mosi ve nkumbu ya mutindu yina na bilumbu yina me luta. Elvis mpe Ricky, mpe ya kele kaka nkumbu ya nsungi, beno me mona. Kana beno kele na mwana kele na nkumbu yina, beno bokila yandi na nkumbu ya yandi ya zole, na yawu, to beno pesa yandi mosi.

⁸¹ Na yina na ntangu yandi vwandaka kuna mutindu yina, yandi talaka na zulu, mpe mu bandaka na kukulumusa yintu ya

munu, mpe mu me mona yandi kutala kieleka . . . Yandi tubaka, “Vingila fyoti! Benda rido yina!”

⁸² Mu tubaka, “Mu zolaka sambila kaka samu na mama. Nge—nge kele mukwikidi ve?”

⁸³ Yandi tubaka, “Mu ke tuba na nge ntangu yayi, beto kele ba-Methodiste, mpe beto zola ti nge benda rido yina!”

“Yinga, mama,” mpe mu bendaka rido.

⁸⁴ Beno me mona, kima mutindu mosi. Kima mutindu mosi bubu yayi, na dibanza mosi! Wapi mutindu yandi zabaka wapi mutindu ya mulongi mu vwandaka? Mu me monaka ata mbala mosi ve kento yayi. Kasi mu banza ti yandi kuwaka muntu kutuba ti mu ke kwikilaka na kubeluka ya bambevo, mpe yandi ba longaka yandi yimbi na zulu ya yawu. Yandi vwandaka ve na kima ya kusala na yawu, yandi sukulaka maboko ya yandi na yawu. Yandi vwandaka na boma ti ya ke kubwa na zulu ya yandi. Beno vwanda na boma ve, ya ke kubwa ve, kulutula ve Pilate yina lendaka kusukula yawu na maboko ya yandi.

⁸⁵ Ntangu yayi, yina kele ve kutuba kima ya nsoni na yina me tadila ba-Methodiste; yina vwandaka kaka kento mosi. [Kisika ya mpamba na bande—Mu.] Beno me mona? Ya lendaka vwanda kaka nkadulu ya yandi. Mu ke banza ve ti ba-Methodiste nyonso ke vwanda mutindu yina, samu ti mu me sambilaka na bawu mingi. Ba ke bokilaka munu na kusambila samu na bawu, mpe bidimbu mpe mambu ya ngitukulu me salamaka na kati ya bawu. Ya kele ata mbala mosi ve bantu na kati ya mabuundu yina; ya kele sysiteme na yisi ya yina bawu kele, ya kele yina ke salaka yawu. Kasi yandi vwandaka mosi ya mutindu ya bawu. Yinki ya vwandaka? Pwazo ya kieleka na meso, musoki ya kuyala ya mpeve ya yimbi.

⁸⁶ Mu lendaka tuba kima mosi. Na—na lukutakanu mosi yina vwandaka awa na mbanza kilumbu mosi, mpe ba yufulaka samu na yinki ba bokilaka munu ve. Kasi mu ke bika kaka yawu samu ti mu kele na yinzo. Kasi, mpe na yina, kukondwa dyambu, ya kele kaka musoki, ya kele credo, ya kele kusambila biteki. Mutindu ti beto ke zolaka kulosa maboko ya beto na muntu nyonso, kasi na ntangu ba ke kima beno . . . Yesu vwandaka zola kusala yawu. Beno bambuka moyo, kilumbu beno fwana bambuka moyo na yawu. Beno fwana bambuka moyo na yawu.

⁸⁷ Ya ke bambusa kaka munu moyo na kimbangi mosi yina salamaka ntama mingi ve. Mulongi, mpe yandi vwandaka na ascenseur, awa na zulu ya Heyburn Building. Mpe ya vwandaka na bantu tatu ya kutelama na mulongi yayi na—na acenseur yango, mpe bawu—bawu vwandaka zaba ve ti bakala yayi vwandaka mulongi, mu banza ve. Mpe na yina bawu vwandaka mata, bawu nyonso telamaka na etaze ya nana. Mpe mosi ya bantu yina talaka mulongi, mpe tubaka, “Nge zaba yinki? Yayi

kele kaka na kutala mutindu pene na Mazulu mutindu beto lenda kwenda.”

⁸⁸ “Mbote,” mulongi tubaka, “Mu—mu banza ti nge kele na rezo. Mu—mu banza ti nge kele na rezo, na yina ntangu nyonso beto ke sala kivuvu na mangolo ya beto mosi, yayi kele pene mutindu beto lenda vwanda.” Ya kele kieleka. Ntangu nyonso yina beno ke tula kivuvu na yina beno ke sala, beno ke bambuka moyo na yina beno salaka. Mpe mu ke ndima ti mingi ya beto zaba ti beto salaka kima ve, beto me nunga kima ve. Yandi tubaka, “Mu banza ti kana beto ke sala kivuvu na mangolo ya beto mosi, yayi kele ntama mutindu beto lenda kwenda.” Mbote, kana beto ke sala kivuvu, yina kele ntama mutindu beto lenda kwenda.

⁸⁹ Kasi, oh, mu ke zola kutuba kima mosi. Kana mu lenda zimbana yina mu vwandaka, mpe kubambuka moyo na yina Yandi kele, kana mu lenda bambuka moyo na Yesu, kana mu lenda bambuka moyo na Yandi na kulunsi, kana mu lenda bambuka moyo na yina Yandi salaka samu na munu, mpe mu lenda bambuka moyo na ngunga yina Yandi sukulaka masumu ya munu, mpe pesaka munu Mpeve-Santu samu na kutwadisa munu, na yina mu ke zanguka na zulu ya nyonso yina ke simba ntoto yayi. Mu kele ya kuzanguka na zulu ya konso kima ya ntoto, na bisika ya Mazulu na kati ya Klisto Yesu, kisika mu lenda bundana na Yandi. Kuna na Mvwandulu ya Yandi, na kuzimbanaka yina mu vwandaka ntete, na kuzimbanaka masumu ya munu nyonso mpe nyonso, samu ti ya kele na Mubu ya Kuzimbana. Ke zimbana nyonso lutaka, ke zimbana nyonso, mpe kubambuka moyo ti Yandi salaka munu ya Yandi Mosi, na nzila ya lufwa ya Yandi Mosi. Yandi bakaka kisika ya munu. Mpe munu yina vwandaka ve na muswa ya kukwenda kisika yankaka kasi na difelo, Yandi bakaka kisika ya munu mpe zangulaka munu na zulu ya difelo. Yandi kwendaka kuna samu na munu. Mpe Yandi zangulaka munu na zulu na lemvo ya Yandi ya nene, tii ntangu yayi beto kele bana ya babakala mpe bana ya bakento ya Nzambi, mpe beto me vwanda na bisika ya Mazulu na kati ya Klisto Yesu, ke yangalala ntangu nyonso mpe ke bambuka moyo na Yandi Yina nataka beto na lukengolo tii awa. Mpe na lukwikilu yina ke bula na kati ya myoyo ya beto, ke bweta beto, mpe na lemvo Yandi ke nata munu tii na nsuka.

⁹⁰ Mpe na meso ya lukwikilu mu ke mona Masonuku ya Yandi kulungisama, “Bayina nyonso Yandi zabaka ntete, Yandi me bokila bawu; bayina nyonso Yandi bokilaka, Yandi me nungisa bawu; mpe bayina nyonso Yandi me nungisa, Yandi me kembisa bawu.” Na yawu na yayi na kati ya dibanza, mu me telama na kati ya dibuundu ya bantu, kisika Mpeve ya Nzambi kele, mpe ba me zangula na kuvwanda na bisika ya Mazulu na kati ya Klisto Yesu. Na kutalaka na ngunga na ntangu kizizi yayi ya yimbi ya luzingu ya muntu yina kele na kubula ya ntima yina ke kufwa,

mpe yina fwana suka kilumbu, ntangu ya ke soba mpe ba ke pesa ntima ya Mpeve yina ke bula ntangu nyonso kukondwa kulemba na zulu ya yawu, kukondwa kubela, kukondwa mawa, kukondwa buboba to kima nyonso.

⁹¹ Beno bambuka moyo na Yesu. Na ntangu kitunga ke kumaka ya mpamba na yinzo, mpe ti ya kele dyaka ve na faline, beno bambuka moyo na Yesu. Na ntangu dokotolo ke tuba ti ya kele dyaka ve na siansi, beno bambuka moyo na Yesu. Na ntangu dyabulu ke meka beno; na yina beto ke yimba nkunga ya beto ya kusukisa, “ntangu kumekama ke zungidila beto, niunguta Nkumbu yina ya Santu na kisambu.”

⁹² Kubambuka moyo na Yesu, kubambuka moyo ti Yandi ke kwiza dyaka. Yesu mosi yina ba katulaka beto ke vutuka dyaka na mutindu mosi beto monaka Yandi kukwenda na Mazulu. Beno bambuka moyo, Yandi ke vutuka samu na bayina ya Yandi Mosi.

⁹³ Beto sambila, mpe na bayintu ya beto ya kukulumusa. Mpe dyaka na Nsangu yayi ya fyoti ya kidi-kidi na kati ya ntima ya beno, beno zola ti Yandi bambuka moyo na beno ntangu yayi? Kana beno zola, beno telemisa kaka maboko ya beno, mpe kima ya mutindu yankaka, “Mfumu, bambuka moyo na munu.” Mutindu powete tubaka, “Bambuka moyo na munu na ntangu maza ya meso ke kulumuka.”

⁹⁴ Tata ya beto ya Kulutila Santu, beto me sepela na mutindu ya nene na Mvwandulu ya Mpeve-Santu, mutindu Yandi me lakisa beto Ndinga ya Luzingu, na yina beto ke bambuka moyo na dibulu na yina ba me buka beto mpe na ntangu yayi me bakama na dibulu yina mpe ba me sala bana ya Nzambi, na nzila ya lemvo ya Yesu Klisto. Mu ke bambuka moyo na Yandi, ntangu dokotolo talaka kizizi ya munu mpe tubaka, “Kaka baminuti fyoti dyaka,” mu ke bambuka moyo na Yesu. Mu ke bambuka moyo na Yesu, ntangu mu vwandaka na autel vwandaka dila samu na kyadi mpe moyo ya munu vwandaka na kizitu, Mu ke bambuka moyo ti kizitu bikaka munu. Yesu bakaka kizitu ya munu. Mwa bangonda me luta, mu vwandaka ya kuvwanda na kiti, vwandaka tala na yisi ya kitala-tala ya munduki, samu na kukubula kima mosi, mpe Satana zolaka banza, “Yayi kele bweso ya munu ntangu yayi.” Mpe ntangu munduki kukubukaka, mpe kano mpe kibumbulu mpe mekaniki ya munduki kwendaka bisika nyonso, mpe tiya mwanganana nyonso na zulu ya munu, mpe mu mekaka na kutelama, mpe menga vwandaka basika na nswalu, mu ke bambuka moyo ti ya vwandaka Yesu. Na ntangu dokotolo, ntangu yandi talaka mpe yandi monaka ata kuyokama ve, yandi tubaka, “Kima kaka mu zaba, ti Mfumu zolaka vwanza ya kuvwanda kuna, mpe, vwandaka keba na kisadi ya Yandi, yandi zolaka mwangana bitini-bitini na mutindu ya kukubuka yina.” O Nzambi, mutindu beto nyonso ke bambuka moyo na bima yina!

⁹⁵ Beto me kwiza na Yinto ya kifuluka na Menga, yina basikaka na misisa ya Emmanuel. Sakumuna beto, Mfumu, kintwadi na nkokila yayi. Nge zaba kikuma mpe motifi na manima ya konso ntima yina me telemisa diboko. Nge zaba luzolo mpe nsatu. Mpe mutindu kisadi ya Nge, Mfumu, mu—mu ke kwiza na bawu, mpe—mpe ke basika na tabernacle yayi na ntangu yayi (na lukwikilu) beto ke kwenda, na manima ya matuti mpe ngonda, mpe bambwetete mpe nzila ya miliki ya pembe, mpe ntangu yayi beto me kuma na Mvwandulu ya Nzambi. Mpe na ntuala ya munu kele autel ya wolo, na zulu kuna ya kele na Munkayulu yina beto ke bambuka moyo, Yesu, yina tubaka, “Beno lomba kaka Tata konso kima na Nkumbu ya Munu, Mu ke—mu ke pesa yawu.” Kubika ve ti lukwikilu ya beto kubwa, Mfumu, kasi bika beto bambuka moyo ti beto me kuzwa yina beto me lomba, kana beto kwikila yawu, na yina beto ke bambuka moyo ti Yesu kufwaka samu na kundimisa yawu na beto mpe samu na kusala yawu kieleka.

⁹⁶ Mfumu, beto ke mona ti Nge ke na kukumisa nene yinzo ya beto. Ya vwandaka Nge yina salaka yayi samu na beto, yina me pesa beto kubwela ya nene yayi ya dibuundu. Mpe beto zaba ti ya vwandaka Nge, Mfumu, Yina pesaka beto dibuundu na mbandukulu. Beto ke sambila ti Nge ke sakumuna bangolo yayi.

⁹⁷ Mfumu, beto ke sambila samu na pasteur ya beto, Mpangi Neville, kisadi ya Nge ya kulemvuka mpe ya lemvo, ya kukwikama. Yandi kele ya kukipesa na kusadila na kisika nyonso, ata kana ya kele na kiti ya manima to kana ya kele samu na kutsyemisa dibuundu. Kisika nyonso Nge ke na nsatu ya Yandi, kuna yandi zola kuvwanda kisadilu, samu na kusadila Nge kisika nyonso Nge ke bokila. Beto ke sambila, Nzambi, ti—ti Nge sakumuna yandi.

⁹⁸ Nzambi, kumekama yayi ya nene na yina kaka mu me lutila, mpe ba-administrateur yayi yina vwanda me telama na lweka ya munu, mpe dibuundu yayi yina—yina vwandaka sambila samu na munu, mpe na nsuka lunungu kukwizaka. O Nzambi, mu ke sambila samu na bawu. Mu ke bambuka moyo na bawu, mpe, Mfumu, mpe mu ke kwikila ti Nge ke sala.

⁹⁹ Beto ke bambuka moyo na balusakumunu yina Nge me vwanda samu na beto. Mpe beto ke bambuka moyo na Ndinga ya Nge, ti Nge ata mbala mosi ve ke bika beto to ke losa beto. Buboba ke vwanda na kima ve ya kusala na yawu, Nge ke bambuka dyaka moyo na beto, ntangu yinza ke vwanda dyaka ve mpe ntangu ke zimbana na Seko. Ya kele ya kusonika kima mutindu yayi, “Mama lenda zimbana mwana ya yandi yina ke kunwa mabene? Mu lenda zimbana beno ata fyoti ve. Nge kele ya kusonika na zulu ya dikanda ya maboko ya Munu,” bansonso yina sonikaka bankumbu ya beto. Beto zaba ti Nge ke bambuka moyo na beto, Mfumu.

¹⁰⁰ Mpe bika ti Nge vwanda ntangu nyonso na kati ya mabanza ya beto, mutindu Mvulusi ya beto, Munganga ya beto, Ntinu ya beto, Nzola ya beto, Luzingu ya beto, Mwini ya beto, Nyonso na Nyonso ya beto, yinto yina ke yumaka ve ya lemvo ya Nzambi mpe ya luzola ya beto bantu ya moyo yina kubwaka ya dikanda ya Adam. Pesa yawu, Mfumu, na yina beto ke kukipesa beto mosi na Nge ntangu yayi, na kukatukaka na tabernacle na nkokila yayi, na kubambukaka moyo na Yesu. Amen.

¹⁰¹ Beno ke bambuka moyo na Yandi? Beno zola Yandi? [Dibuundu me tuba, "Amen."—Mu.] Ntangu yayi mu banza, na mwa Nsangu ya beto ya kidi-kidi, beto lendaka tuba yayi. Paul tubaka, "Nyonso yina beto ke sala, beto sala na Kimpeve." Na bima nyonso beto fwana bambuka moyo na Yandi. Beto baka ve lukanu tii beto ke bambuka moyo na Yandi; beto sala kima mosi ve, samu ti ya ke vwanda mpamba. Kana mbeni me bula lweka mosi ya ditama, beto bambuka moyo na yina Yandi salaka ntete beto kuvutula. Beto bambuka moyo na mutindu ya Yandi ya kusala. Kana ya kele na lukanu ya kubaka, beto vingila, beto bambuka moyo na wapi mutindu ya lukanu beto ke banza ti Yandi zolaka baka, na yina bika ti yina kuvwanda lukanu ya beto. Kana beto me kuma na mbangu, beto bambuka moyo ti Yandi vwandaka ata mbala mosi ve na kati ya mbangu. Beno me mona? Kana beto me kuma na ntima tiya-tiya, beno bambuka moyo ti Yandi ke zingaka na kati ya Seko, ntangu zola kutuba kima mosi ve samu na Yandi. Ya kele motifi mpe kikuma ya ntima ya beto. Beto bambuka moyo na Yandi.

¹⁰² Mpe beto bambuka moyo na Yandi ntangu yayi na yina beto ke yimba nkunga yayi na Kimpeve ya Mvwandulu ya Yandi, *Mu Zola Yandi*. Kana beno ke zinga na zola, beno ke zinga na Nzambi, samu ti Nzambi kele zola. Bawu yina ke zingaka na kati ya Nzambi ke zingaka na kati ya zola. Beno me mona? Mpe zola kele kuyina ve. Zola kele musoki ve. Zola kele lunangu ve. Zola ke salaka yimbi ve. Zola kele ntangu nyonso lutondo, mbote, ke lemvo, lembami. Ata mutindu yimbi bayankaka kele, zola kele kaka mutindu yawu kele. Zola kele dikunzi ya lemvo. Zola kele dikunzi ya Nzambi samu na beto. Na manima ya makabu nyonso yankaka mpe bima ke zimbana, bapofesi ya beto, bandinga ya beto, bantendulu ya beto, nyonso yina beto me salaka, to nyonso yankaka, ntangu zola ke kota, ya kele dikunzi. Ya kele na zulu ya nyonso, samu ti nyonso yankaka ke kubwa. Ya kele—ya kele lukanu ya Yinzo ya Nene ya Lusambusu. Ya kele Poto ya kusimbidila. Ya kele Mbwetete ya Node yina ke bumbaka marin na kitezo. Ya kele Boussole yina ke twadisaka beto. Zola kele dikunzi. Beto bambuka moyo na yawu na yina beto ke yimba, "Mu zola Yandi."

Mu zola Yandi, mu zola Yandi
Samu Yandi zolaka munu ntete

Mpe futaka mpulusu ya munu
Na yinti ya Calvaire.

Mu zola Yandi, mu zola Yandi
Samu Yandi . . .

Ntangu yayi beno bambuka moyo, “Yandi zolaka munu, mpe pesaka Mwana ya Yandi.”

Mpe futaka mpulusu ya munu
Na yinti ya Calvaire.

¹⁰³ Ntangu yayi na yina mpangi ya beto ya kento ke pesa noti ya nkunga yayi samu na beto. . . [Mpangi Branham ke yimba na kati ya yinwa *Mu Zola Yandi—Mu.*] Ti kaka na bumbote ya kubundana, na yina beto kele ya kuvwanda kintwadi na bisika ya Mazulu na kati ya Klisto, ntangu yayi beno katula nyonso, kima nyonso na ntima ya beno. Mpe beno bambuka moyo, Ndinga ya Nzambi ke tuba mutindu yina. Mu kele kisadi ya Yandi. Yandi kele awa. Na yina beto pesana mbote na muntu, mpe kutuba, “Nzambi sakumuna nge, mpangi.” Kana beno kele na mbeni, beno telama mpe beno kwenda na yandi, beno me mona, “Nzambi sakumuna nge, mpangi,” na yina beto ke yimba dyaka refrain mpe ke pesana mbote mosi na yankaka. Beno zola kusala yawu ve ntangu yayi, na lembami nyonso na Kimpeve.

Mu zola Yandi, (Nzambi sakumuna nge,
Mpangi Roy.) . . . zola Yandi
Samu . . . zolaka munu ntete
Mpe futaka mpulusu ya munu

. . . ? . . . Na maboko ya beto na zulu ntangu yayi.

Mu zola Yandi, mu zola Yandi
Samu . . . (Beni bambuka moyo na Yesu!)
Mpe futaka mpulusu ya munu
Na yinti ya Calvaire.

¹⁰⁴ Ntangu yayi beto kulumusa bayintu ya beto mpe beto yimba yawu na kati ya yinwa. Na kubambukaka moyo na Yesu!

. . . zolaka munu ntete.

[Mpangi Branham ke na kuyimba na kati ya yinwa.]

¹⁰⁵ Ntangu yayi na yina mpangi ya beto ya kento ke pesa noti, na malembe mpe mbote nyonso, mu ke lomba na mpangi ya beto ya bakala ya mbote. . . Mpangi Neville, nge kele na dyambu nge zola kutuba, kima mosi? Mbote mingi. Mu ke lomba na Mpangi Collins na manima kuna, mpangi ya beto ya ntwenya ya bakala ya kwikama awa, mosi ya bampangi ke salaka na beto, kana yandi zola kukwiza samu na kusala samu na beto kisambu ya nsuka. Na yina beto ke kulumusa bayintu ya beto, Mpangi Collins.



KUBAMBUKA MOYO NA MFUMU KNG62-1209

(Remembering The Lord)

Nsangu yayi ya Mpangi William Marrion Branham, kulongamaka na Kingelesi, na Lumingu na nokokila, na kilumbu ya 9 ya Ngonda ya kumi na zole, na mvula 1962, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org